

0 10 20 30 40 50 60 70 80 90 100 110 120 130 140 150

41.132
5234
33




Inches

Centimetres

TIFFEN Color Control Patches

© The Tiffen Company, 2007



助字辨略卷三目錄

上聲

孔

總

只

軹通

彼

此

爾

尔同

底

抵通

統

動

是

僂

俾

耳

止



以 呂同

似 余同

使

唯

矣

匪

與

所

甫

已 里附

比

始

幾

豈

猥

許

舉

取

愈 俞通

每

殆

迨

乃 迺同

矧

忍

盡 儘同

準

允

近

反

宛 但通

本

但

誕

但

斷

者 夥 叵 果 好 少 轉 展 倪

也 舍 頗 坐 可 了 小 審 鮮

匙同

可 整 頃 請 妄 黨 罔 且 雅

有 等 竝 鼎 併 枉 儻 往 假

並同

否

後后通

某

寢浸寢滯漫同

甚

敢

奄

偶

苟

陡

審

恁

漸

憺

助字辨略卷三

孔 爾雅云甚也詩國風父母孔邇書禹貢九江孔殷

統 後漢書胡廣傳夫紆於物則非己直於志則犯俗

辭其艱則乖義徇其節則失身統之方軌易因險塗

難御故昔人明慎於所受之分遲遲於岐路之間也

注云統者總論上事也愚案統之猶言總之

總 廣韻云合也皆也愚案統也都凡之辭也史記五

帝紀總之不離古文者近是杜元凱左傳序傳之義



例總歸諸凡

動 漢書食貨志又動欲慕古不度時宜世說簡文為相事動經年然後得過李義山詩殷憂動即來凡云動者即兼動輒之義乃省文也動舉動也輒即也言每舉動即如此也

只 說文云語已辭左傳襄公二十七年叔向謂趙孟曰諸侯歸晉之德只非歸其尸盟也杜注云只辭也又詩國風樂只君子鄭箋云又能以禮義樂其君子正義云南山有臺箋云只之言是則此只亦為是此

箋云樂其君子猶言樂是君子矣朱傳云只語助辭愚案德只樂只竝助辭也如國風母也天只不諒人只宋玉大招純用只字乃語已辭如今思之屬又通作軹莊子大宗師而奚來為軹崔譔云軹辭也又莊子徐無鬼請只風與日相與守河而河以為未始其櫻也杜子美詩寒花只暫香又云只想竹林眠此只字義同止猶云但也

是 非之反也論語是知也孟子是尚友也又此也孟子非是之謂也漢書刑法志有君若是其賢也若是

猶如此也又書蔡仲之命惟德是輔論語今之孝者是謂能養左傳昭公七年公曰何謂六物對曰歲時日月星辰是謂也此是字語助不爲義也爾雅云時是也又云實是也詩伊可懷也鄭箋云伊當作繫猶是也然則時實伊是皆音相近故通得爲語助也又史記鄭世家子亶曰齊強而厲公居櫟卽不從是率諸侯伐我內厲公我不如往此是字謂齊指物之辭也又易繫辭是興神物以前民用此是字發語辭猶云爰也又顏氏家訓呂尙之兒如不爲上趙壹之子

儻不作一便是下筆卽妨是書皆觸也是書之是猶凡也言凡是書札皆觸忌諱也今謂處處曰是處猶云到處也又左傳桓公六年於是乎民和而神降之福僖公二十五年晉於是乎作爰田晉於是乎作州兵昭公元年於是乎煩乎淫聲悞堙心目漢書高帝紀於是陳平夜出女子東門二千餘人萬石君傳奮長子建次甲次乙次慶皆以馴行孝謹官至二千石於是景帝曰石君及四子皆二千石人臣尊寵舉集其門號奮爲萬石君於是者繼事之辭猶云爰乃也

又隱公十一年君子謂鄭莊公於是乎有禮襄公三年君子謂祁奚於是能舉善矣案傳謂鄭莊公定許而不有此一處置爲中乎禮故云於是乎有禮祁奚三舉皆不私故云於是能舉善皆因前事而爲論定之辭或云君子謂鄭莊公於是乎有禮者言有禮僅見於此而它處不然乃寓刺之文然則祁奚可容刺耶知不然矣又左傳僖公十五年震夷伯之廟罪之也於是展氏有隱慝焉史記項羽紀廣陵人召平於是爲陳王徇廣陵未下韓退之輩太傅狀又拜國子

祭酒宣慰恆州於是朱滔自范陽以回紇之師助亂人大恐此於是猶云其時尚書諸時字竝訓作是則是亦可通作時也又孟子則是方四十里爲阱於國中駱賓王上司刑太常伯啟側聞魯澤祥麟希委質于宣父吳阪逸驥實長鳴于孫陽是則所貴在乎見知所屈伸乎知己則是是則其義竝同承上文爲斷辭也又漢書高帝紀是日車駕西都長安是日猶卽日也又左傳僖公十五年三施而不報是以來也孟子是以若彼濯濯也詩關雎序是以一國之事繫一

人之本正義云是以者承上生下之辭言詩人作詩用心如此愚案是以猶云所以

彼 廣韻云對此之稱愚案俗謂此曰者箇曰者樣謂

彼曰那箇曰那樣如詩國風嘒彼小星彼茁者葭此彼字猶云那箇也如孟子管仲得君如彼其專也此彼字猶云那樣也義微有別

俛 列子俛俛成者倘成者也初非成也俛幾也將也倘似也言將成有似於成本非成也俛與危音相近故得爲幾將之辭

此 是也茲也彼之對也禮記禮運如此乎禮之急也孟子其自任以天下之重也如此又云如此然後可以爲民父母漢書刑法志宣帝自在閭閻而知其若此又云夫以孝文之仁平勃之知猶有過刑謬論如此甚也又指物之辭左傳莊公二十二年陳衰此其昌乎此謂敬仲也又大學此以沒世不忘也此以猶云是以所以又大學有德此有人有人此有土有土此有財有財此有用後漢書黃瓊傳自生民以來善政少而亂俗多必待堯舜之君此爲志士終無時矣

諸此字猶云斯也乃也又吳志宗室傳松笑曰屬亦
自忿行事有此豈有望邪有此猶言如此

俾 廣韻云使也愚案詩國風俾也可忘書大禹謨勸
之以九歌俾勿壞竝是意欲其如此其義虛而未定
非使令之謂也使令之使其義實故使民奉使之使
不得云俾也又省作卑荀子引詩俾民不迷作卑民
不迷

爾 與尔同此也是也襄陽耆舊傳自爾以來自爾猶
云自此也世說謝仁祖年八歲謝豫章將送客爾時

已神悟自參上流又云許掾嘗詣簡文爾夜風恬月
朗爾時是時也爾夜是夜也又吳志大帝傳注此鼠
子自知不能保爾許地也爾此也許助辭爾許少辭
也又世說名教中自有樂地何爲乃爾也又云正始
之音正當爾耳又云君不得爲爾此爾字猶云如此
也漢書田叔傳相曰王自使人償之不爾是王爲惡
而相爲善也吳志周魴傳不爾以往無以成也不爾
猶云不如此也又廣韻云辭之必然也愚案辭之必
然者語已之辭義無可疑如也已之類也孟子是何

足與言仁義也云爾趙注云云爾者絕語之辭也又
論語則可謂云爾已矣此云爾猶言如此與上義別
云得爲如者詩國風云何呀矣之云義爲如也又論
語女得人焉爾乎朱子語類云焉爾乎語助辭聖人
之言寬緩而不急迫文公羊傳隱公二年前此則曷
爲始乎此託始焉爾何休云焉爾猶于是也愚案此
焉爾亦語已辭若以爲於是則紀子伯莒子盟于密
傳云紀子伯者何無間焉爾此焉爾甯可作於是耶
又應劭風俗通義序周秦常以歲八月遣輜軒之使

求異代方言還奏籍之藏于祕室及嬴氏之亾遺脫
漏棄無見之者蜀人嚴君平有千餘言林閭翁孺才
有梗概之法楊雄好之天下孝廉衛卒交會周章質
問以次注續二十七年爾乃治正凡九千字魏志楊
阜傳書曰九族旣睦協和萬國事思厥宜以從中道
精心計謀省息費用吳蜀以定爾乃上安下樂九親
熙熙此爾字猶云斯也然後也爾旣訓此故得轉爲
斯也又張平子西京賦爾乃廣衍沃野厥田上上又
云爾乃廓開九市通闡帶闡凡賦之更端發語多云

助字辨
爾乃或云爾其與上爾乃義別又禮記檀弓爾毋從
從爾爾毋扈扈爾又云居處言語飲食衍爾漢書淮
陽王傳博得謁見承問進問五帝三王究竟要道卓
爾非世俗之所知諸爾字猶云然也又吳志劉繇傳
一爾分離款意不昭世說于時江左營建始爾此爾
字語助辭不爲義也又詩小雅爾公爾侯猶云乃公
乃侯亦助辭也又溫飛卿詩爾來何處不恬然爾來
猶近來也

耳 顧氏日知錄云而已爲耳愚案語已辭也如漢書

賈誼傳逐利吝耳以爲是適然耳又云主耳忘身國
耳忘家公耳忘私竝與而已相近主耳忘身者言所
念唯主而已不及身也又爲語餘聲與邪相近魏志
崔炎傳注後與南郡習授同載見曹公出授曰父子
如此何其悖耳此耳字有詠歎之意與而已義別吳
志劉惔傳注吳主共論鱸魚何者最美象曰鱸魚爲
上吳主曰論近道耳此出海中安可得邪象曰可得
耳論近道耳之耳是而已之辭可得耳之耳乃語之
餘聲言易得也又孟子盡心焉耳矣趙注云焉耳者

懇至之辭孫疏云旨矣者言至極也愚案凡云旨矣者盡而無餘之辭如莊子人間世雖然止是旨矣亦同此義故趙孫訓為懇至至極也

底 列子林類底春被裘注云底及也又韓退之詩潮州底處所又云有底忙時不何來李義山詩柳映江潭底有情此底字何也那也又元微之詩那知下藥還沾底此底字猶云此也又通作抵溫飛卿詩去帆不安幅作抵使西風言帆不安幅將用何物以使西風也

止 詩國風既曰歸止曷又懷止止與只同語已辭也又詩關雎序箋云今謂此序止是關雎之序庾子山華林園馬射賦止立行宮裁舒帳殿此止字僅辭也

以 古作呂廣韻云用也論語不以禮節之又云道之以政齊之以刑莊子逍遙游奚以之九萬里而南為漢書食貨志呂臨萬貨呂調盈虛呂收奇羨又左傳僖公二十六年公以楚師伐齊取穀凡師能左右之曰以杜注云左右謂進退在己愚案能左右之亦用辭也又漢書高帝紀鄉者夫人兒子皆以君此以字

且字辨略
猶因也以得爲因者因是爰辭爰用相通以旣爲用
故可轉爲因也又列子宋人執而問其以注云以故
也愚案以得爲故者亦因之轉也如詩國風何其處
也必有以也史記惠景侯者表太史公讀列侯至便
侯曰有以也夫有以猶云有因有故也又左傳昭公
十三年我之不共魯故之以杜注云不共晉貢以魯
故也愚案魯故之以猶云因魯之故倒文也又易繫
辭夫易廣矣大矣以言乎遠則不禦以言乎邇則靜
而正以言乎天地之間則備矣此以字猶云于以乃

爰辭也又詩國風其釣維何維絲伊緡鄭箋云釣者
以此有求于彼何以爲之乎以絲爲之綸則是善釣
也以言王姬與齊侯之子以善道相求周頌匪且有
且匪今斯今正義云謂嘉慶禎祥之事非謂其有而
已有之以言報應之疾也儀禮士相見禮吾子有辱
鄭注云有又也正義云鄭轉有爲又者以言某子以
命命某往就彼見吾子又自辱來于義爲便故從又
不從有也愚案此以字猶云所以所以者求其故而
言之亦因之轉也又論語禮以行之孫以出之信以

成之韓退之賀冊尊號表歡欣踊躍以歌以舞此以
字語助不爲義也又易坤卦六二象曰六二之動直
以方也春秋隱公七年戎伐凡伯于楚邱以歸禮記
樂記其哀心感者其聲噍以殺其樂心感者其聲擘
以緩孟子自有生民以來史記天官書幽厲以往尙
矣高帝紀南浮江漢以下此以字猶而也又論語無
以爲也無以猶云不可如此爲字語助也又易復卦
上六用行師終有大敗以其國君凶朱子本義云以
猶及也愚案以與古通與得爲及故以亦得爲及也

如論語季康子問使民敬忠以勸猶云敬忠與勸也
魏書李順傳此年行師當克以不猶云當克與否也
韓退之詩凡今之人急名以官蔣之翹云韓文與多
作以也又孟子三月無君則弔不以急乎以通已已
急言太急也又孟子無以則王乎朱注云以已通用
無已言必欲言之而不止也愚案此與下篇無已則
有一焉義同緣上文旣云臣未之間也是謀非吾所
能及也更爲之轉作商量故云無以則王乎無已則
有一焉也如管子臣聞之消息盈虛與百姓絀信然

後能以國甯勿已者朋其可乎亦是轉作商量之語
非必欲言之不止也又史記趙世家以服爲臣王右
軍帖此心以馳于彼此以字亦通已猶云旣已也又
禮記檀弓天則不雨而望之愚婦人于以求之毋乃
已疏乎陳氏集說云于以求之猶言于此求之

已漢書禮樂志自夏以往其流不可聞已師古云已
語終辭馮唐傳唐對曰齊尙不如廉頗李牧之爲將
也上曰何已師古云已猶耳愚案何已問辭也凡問
之餘馨揚以長則爲何邪何與抑而短則爲何已何

耳又左傳桓公六年在我而已大國何爲而已言無
餘事也又漢書序傳敝義依霍庶幾云已如淳云若
此人無益于治可爲庶幾而已也愚案云已猶而已
史記太史公自序強弱之原云以世徐廣云云以世
一作云已也引庶幾云已爲證索隱云以當作已世
當作也竝誤云已也皆語助辭愚案注以爲漢興以
來諸侯廢立分削譜紀不明聊復紀其強弱之原而
已故云強弱之原云已也此云已與序傳義同索隱
云竝誤者謂已誤以也誤世不知已以通用本不爲

誤特也字隸文與世相近而訛耳然此句上下當有闕文又書梓材已若茲史記夏紀召湯而囚之夏臺已而釋之周紀武王已乃出復軍項羽紀韓王成無軍功項王不使之國與俱至彭城廢以爲侯已又殺之倉公傳此病得之當浴流水而寒甚已則熱諸已字猶云既也又廣韻云止也甚也詩國風無已大康毛傳云已甚也正義云已訓止也物甚則止故已爲甚也顧氏日知錄云已卽太也愚案已太過也已太重言也又禮記檀弓吾得正而斃焉斯已矣賈疏云

已猶了也愚案此已字乃是止辭如史記趙世家李兌曰諾子勉之矣吾見子已今年耳已今年者言止今年相見也又史記荆軻傳終已不顧終已竟辭猶言卒也又史記倉公傳卽嘗已爲人治診病洩死生有驗嘗曾也已嘗也嘗已重言也凡曾爲此事曰已故已得爲嘗也又世說吾時月不見黃叔度則鄙吝之心已復生矣又云嵇阮山劉在竹林酣飲王戎後往步兵曰俗物已復來敗人意此已字猶又也又書大誥已予惟小子孔傳云已發端歎辭正義云復歎

而言已乎我惟小子也康誥已汝惟小子乃服孔傳
云已乎汝惟小子乃當服行德政愚案已音與噫諱
相近故得爲發端歎辭也又漢書文帝紀年八十已
上賜米人月之石肉二斗斤宇文道庾子山集序今
之所撰止入魏已來此已字與以通又爾雅云已此
也郭注云方俗異語邶疏云已此音相近故得爲此
也又考工記里爲式然後可以傳眾力鄭注云里讀
爲已馨之誤也

似 廣韻云類也象也論語屏氣似不息者吳志太史
慈傳竝觀察子魚所以牧禦方規何似似始也何似
何如也又世說龐士元曰論王霸之餘業覽倚仗之
要害吾似有一日之長王大將軍云阿平故當最劣
庾曰似未可劣此似字疑辭也又元微之詩子蒙將
此曲吟似獨眠人吟似猶云吟向

比 孟子願比死者一洗之文云且比化者無使土親
膚朱注云比猶爲也又魏志東夷倭人傳對應聲曰
噫比如然諾比如譬如也

使 論語使驕且吝後漢書仲長統傳使居有良田廣

宅使假設之辭也又史記孔子世家譬使仁者而必
信安有伯夷叔齊使智者而必行安有王子比干譬
使重言也

始 廣韻云初也左傳隱公五年於是初獻六羽始用
六佾也隱公八年號公忌父始作卿士於周又論語
始吾於人也聽其言而信其行史記高帝紀沛公曰
始懷王遣我固以能寬容曹相國世家參始微時與
蕭何善此始字追原之辭也與上義別又禮記月令
桃始華蟬始鳴班固典引乃始虔鞏勞謙兢兢業業

貶成抑定不敢論制作洛陽伽藍記趙逸云郭璞嘗
為吾筮云壽年五百歲今始餘半此始字猶云方也
纔也又論語賜也始可與言詩已矣溫飛卿詩霸才
無主始憐君此始字猶云乃也然後也又莊子齊物
論有以為未始有物者未始猶言未嘗

唯 論語曾子曰唯朱注云唯者應之速而無疑也楚
襄王問宋玉曰先生其有遺行與何士民眾庶不譽
之甚也宋玉對曰唯然有之然亦應聲也既唯又然
重應之也案禮記內則男唯女俞則唯乃應之急而

俞乃應之徐然唯字有兩義如曾子曰唯是答者心契其言而更無所疑惑之辭如宋玉曰唯則是猶未以爲然姑且答之然後徐理其說也史記范雎傳秦王曰先生何以幸致寡人范雎曰唯唯若是者三此唯字竝是姑且作答與曾子之唯不同也又鬻子對文王曰唯疑注云旣唯而又疑如太史公唯唯否否之意愚案此類竝是姑應之辭非實然之也

幾

左傳僖公二十三年夫有大功而無貴仕其人能靖者與有幾杜注以其人能靖者句絕陸氏釋文以

與字句絕愚案陸說爲長言有大功而不酬之以貴仕其人能安靖邪有幾人也有幾正謂其無人也荀子議兵篇是其出賃市傭而戰之幾矣楊注云此與賃市中傭作之人而使之戰相去幾何也愚案幾矣者言相去無多也又史記循吏傳如此幾何頃乎此云幾何猶今問多少不定之辭也左傳昭公十六年子太叔子羽謂子產曰韓子亦無幾求杜注云言所求少又詩國風未幾見兮突而弁兮未幾無多時也又吳商浩詩零落幾多紅藕花幾多猶今云許多言

不少也又南唐李後主詞三十餘年家國數千里地
山河幾曾慣干戈幾曾何曾也又荀子榮辱篇是其
爲相縣也幾直夫芻豢之縣糟糠爾哉楊注云幾讀
爲豈史記黔布傳人相我當刑而王幾是乎徐廣云
幾一作豈愚案幾是乎者疑辭也又左傳昭公十六
年幾爲之笑而不陵我顧氏補正云言幾見有爲之
笑而不陵我者乎與十年傳幾千人而國不亾二十
四年傳幾如是而不及郢義同愚案此幾字亦當訓
豈猶言豈有如此而不如此者反言之也

矣 說文云語已辭論語吾必謂之學矣是知津矣此
矣字辭氣定柳子厚所謂沒辭者也又論語忠矣清
矣此矣字辭氣未定有僅可之意未深許之也又論
語惡不仁者其爲仁矣不使不仁者加乎其身其爲
仁矣猶云其爲仁也是頓挫之辭言惡不仁者其於
爲仁也不使不仁之事加乎其身不使不仁之或加
是乃所以爲仁也又論語周之德其可謂至德也已
矣凡語已辭詠歎深至則辭氣闡緩而長故重疊言
之也又孟子天下之言性也則故而已矣而已矣者

盡而無餘之辭也又孟子如以辭而已矣雲漢之詩
曰周餘黎民靡有子遺信斯言也是周無遺民也此
而已矣與上義別乃反起下文辭之未畢者也又論
語甚矣吾衰也史記楚元王世家甚矣安危在出令
存亾在所任誠哉是言也甚矣者深歎之也

豈

廣韻云安也焉也甯也愚案又甯也孟子豈能獨

樂哉此豈字安也焉也甯也金重于羽者豈謂一鈞
金與一輿羽之謂哉此豈字甯也甯也詩國風豈不
夙夜調行多露此豈字甯也非也又何也論語且而

與其從辟人之士也豈若從辟世之士哉漢書賈誼
傳豈如今定經制令君君臣臣上下有差父子六親
各得其宜豈若豈如猶云何若何如漢書王貢兩龔
傳谷口鄭子真不詘其志耕于巖石之下名震于京
師豈其卿豈其卿豈其卿者猶云何必卿也又後漢
書爰延傳夫以光武之聖德嚴光之高賢君臣合道
尙降此變豈況陛下今所親幸以賤爲貴以卑爲尊
哉吳志諸葛恪傳自孔氏門徒大數三千其見異者
七十二人至于子張子路子貢等七十之徒亞聖之

德然猶各有所短師辟由嗛賜不受命豈況下此而無所闕豈況何況也又論語其然豈其然乎史記項羽紀羽豈其苗裔邪漢書卜式傳家豈有冤欲言事乎此豈字辭之未定與宥義通文史記封禪書此豈所謂無其德而用事者邪吳王濞傳毋爲權首反受其咎豈盍錯邪漢書西南夷兩粵朝鮮傳追觀太宗填撫尉佗豈古所謂招攜以禮懷遠以德者哉此豈字亦辭之未定猶云殆也又後漢書隗囂傳若囂命會符運敵非天力雖坐論西伯豈多噉乎注云多厚也言未可厚以爲非笑也愚案此豈字猶云豈可省文也又吳語春秋貢獻不解于王府大王豈辱裁之此豈字與其通音相近也

匪

廣韻云非也易屯卦六二匪寇婚媾又不也詩大

雅夙夜匪解後漢書順帝紀閒者日食毀鉞陽光晦暗朕祇懼潛思匪遑啟處又左傳襄公八年引詩如匪行邁謀是用不得于道杜注云匪彼也顧氏補正云詩箋云不行而坐圖遠近故不得于道路也此解曰匪彼也行邁謀謀于路人也不得于道眾無適從

案詩上文云謀夫孔多是用不集發言盈庭誰敢執其咎則此解爲長古人有以匪字作彼字用者二十年引詩彼交匪敖作匪交匪敖愚案謀夫雖多而無老成人譬如行邁而不與行邁者謀終不得其道耳此匪字當仍訓非然補正說亦通兩存之以備考又宇文道庾子山集序年十五侍梁東宮講讀雖桓麟十四之歲荅宿客之詩魯連十二之年杜離堅之辨匪或斯尙同日語哉此匪字猶豈也或語助尙庶幾也言桓麟魯連未可與此同日而語也

猥

漢書律歷志壽王猥曰安得五家歷王尊傳猥歷奏大臣師古竝云猥曲也劉歆傳猥以不誦絕之師古云猥苟也苟不誦習之而欲絕去此學曹子建上責躬詩表不圖聖詔猥垂齒召李善云猥猶曲也殷仲文詩猥首阿衡朝五臣云言己以凡猥妄首朝端也許慎淮南子注猥猶凡也正字通云猥鄙也凡自稱猥者卑辭也愚案猥猶云謬也

與

論語夫子之言性與天道不可得而聞也正義云與及也史記周紀昔自夏后之衰也有二神龍止于

夏帝庭而言曰余衰之二君夏帝卜殺之與去之與止之莫吉漢書刑法志凡有爵者與七十者與未齷者皆不爲奴諸與字並及也若也又漢書高帝紀今某之所就孰與仲多師古云與亦如也匈奴傳單于自度戰不能與漢兵師古云與猶如也東方朔傳上復問朔方今公孫丞相兒大夫董仲舒夏侯始昌司馬相如吾邛壽王主父偃朱買臣嚴助汲黯膠倉終軍嚴安徐樂司馬遷之倫皆辨知閎達溢于文辭先生自視何與比哉師古云何與猶言何如也張平子

西京賦此何與于般人屢遷前八而後五李善云廣雅云與如也言欲遷都洛陽何如般之屢遷乎又論語禮與其奢也甯儉左傳閔公元年爲吳太伯不亦可乎猶有令名與其及也與其反設之辭傳先云猶有令名後云與其及也者倒文也又孟子與我處畝畝之中由是以樂堯舜之道吾豈若使是君爲堯舜之君哉史記魯仲連傳吾與富貴而詘于人甯貧賤而輕世肆志焉此與字卽與其省文也漢書藝文志漢興魯申公爲詩訓詁而齊轅固燕韓生皆爲之傳

或取春秋采雜說咸非其本義與不得已魯最爲近
之師古云與不得已者言皆不得也三家皆不得其
真而魯最近之愚案此云三家皆非本義與其皆不
得毋甯魯也又漢書賈誼傳陛下雖賢誰與領此此
與字猶共也又杜元凱左傳序又別集諸例及地名
譜第歷數相與爲部凡四十部十五卷相與者比合
之辭也

許 古樂府柰何許石闕生口中銜碑不得語世說直
以真率少許便足對人多多許許者語之餘聲不爲

義也如李太白詩柰何成離居相去復幾許杜子美
詩我生本飄蓬今復在何許似乎幾許爲幾何何許
爲何所然相去復幾便是幾何今復在何便是何所
幾何何所之義不因許字而見特借許字爲助句耳
如問何許人財何許又爲何等不爲何所矣他若爾
許之爲此如許之爲如此許字在此竝是助辭不爲
義也或問爾許之許爲助句是也如許之許亦作助
句甯如字可訓爲如此耶白如此猶云箇樣今人語
緩則云箇樣語急則竟云箇矣然則如許之如亦語

之急者也

所處所也借爲語助然凡云所皆有所在雖不爲義要自與而以之屬別如論語視其所以觀其所由察其所安所以所由所安皆有方向故云所也大學其所厚者薄而其所薄者厚所厚所薄皆據其人而言也中庸舟車所至人力所通天之所覆地之所載此爲所至所通所覆載之處而言也又中庸所求乎子以事父未能也所求乎臣以事君未能也此以求子求臣之道事君父有一定之則故云所也又詩小雅

所謂伊人于焉嘉客此指意中欲留之人故云所謂大學所謂脩身在正其心者此所謂引前文也詳四卷謂字條下凡此所字皆有所指目非空爲助句者也又論語予所否者天厭之天厭之注疏云所誓辭也左傳僖公二十四年所不與舅氏同心者有如白水文公十三年所不歸爾帑者有如河宣公十七年所不此報無能涉河襄公二十三年所不請于君焚丹書者有如日二十五年嬰所不唯忠于君利社稷者是與有如上帝昭公三十一年所能見夫人者有

如河定公三年余所有濟漢而南者有若大川六年
所不以爲中軍司馬者有如先君哀公十四年所不
殺子者有如陳宗杜注並云所誓辭也愚案所字未
必便是誓辭疑當時誓辭之例以所字爲發句而繼
之以有如云何也又孟子所以不願人之膏粱之味
也所以不願人之文繡也所以猶云故也又漢書于
定國傳日夜思惟所以未能盡明思惟所以猶云思
惟其故與上所以義別又孟子其所以放其良心者
亦猶斧斤之於木也又云拱把之桐梓人苟欲生之

皆知所以養之者漢書張安世傳賀內傷太子無辜
而曾孫孤幼所以視養拊循恩甚密焉所以放其良
心者原其放之之心皆知所以養之者原其養之之
術所以視養拊循者原其視養之密非可悉舉其事
故統云所以也又漢書賈誼傳此所以爲主上豫遠
不敬也所以體貌大臣而厲其節也此言廉遠地則
堂高故刑戮不加于大臣乃爲主上豫遠不敬而厲
大臣忠節之道也又云夫嘗已在貴寵之位天子改
容而體貌之矣吏民嘗俯伏以敬畏之矣今而有過

帝令廢之可也退之可也賜之死可也滅之可也若夫束縛之係縲之輸之司寇編之徒官司寇小吏詈罵而榜笞之殆非所以令眾庶見也夫卑賤者習知尊貴者之一旦吾亦迺可以加此也非所以習天下也此言眾庶可以辱大臣其流將瀆以及上非習教眾庶豫遠不敬之道也皆探本言之故言所以文誼策云諸侯之地其削頗入漢者爲徙其侯國及封其子孫也所以數償之此言諸侯之地已削而入于漢其後又以之封它侯國不可奪見在者還舊封之諸

侯別以它地如其祖所封之數而償之也此所以猶云其以又禮記檀弓其高可隱也鄭注云隱據也封可手據謂高四尺所疏云言墳之高可四尺之所以人長八尺低而據之半爲四尺且約上墳崇四尺故云四尺所所是不定之辭愚案四尺所猶云四尺許未定是四尺強弱故云所也如漢書疏廣傳數問其家金餘尙有幾所師古云幾所猶言幾許又如史記畱侯世家父去里所復還吳志周魴傳才畱三千所兵守武昌百世說自後賓客絕百所曰諸所字竝許

辭也又漢書佞幸傳上有酒所師古云言酒在體中
師古訓所爲處所故云酒在體中恐非此言被酒而
已未至沈醉故云有酒所此所字亦是語助不爲義
也

舉 孟子舉欣欣然有喜色注云舉皆也漢書曹參傳
參代何爲相國舉事無所變更師古云舉皆也言凡
事皆無變改愚案此舉字徑訓凡于義爲協又顏氏
家訓舉家無食汝何處來舉家猶云全家

甫 廣韻云始也愚案始也方也纔也漢書成許后傳
今吏甫受詔讀記師古云甫始也宋書謝靈運傳至
于建安曹氏基命三祖陳王咸畜盛藻甫乃以情緯
物以文被質甫乃方乃也蜀志秦宓傳甫欲鑿石索
玉剖蚌求珠今乃隋和炳然有如皎日甫欲者方欲
如何而猶未如何也

取 孟子楊子取爲我朱注云取者僅足之意言僅足
於爲我而已不及爲人也漢書佞幸傳二人之寵取
過庸不篤師古云纔過於常人耳不能大厚也愚案
纔亦僅也又岑嘉州詩別君能幾日看取鬢成絲白

香山詩聽取新翻楊柳枝此取字語助也

愈益也又與俞通荀子榮辱篇清之而俞濁者口也
拳之而俞瘠者交也楊注云俞讀爲愈又史記秦本
紀遂復三人官秩如故愈益厚之愈益重言也又後
漢書班固傳彪固譏遷以爲是非頗謬于聖人然其
議論常排死節否正直而不序殺身成仁之爲美則
輕仁義賤守節愈矣注云愈猶甚也愚案愈矣者省
文言愈甚也又左太沖三都賦孰愈尋靡蒞于中達
造沐猴于棘刺孰愈猶云何異言相去無幾也

每爾雅云每有雖也郭注云詩曰每有良朋辭之雖
也邢疏云小雅常棣云每有良朋況也永歎毛傳云
況茲永長也箋云每有雖也良善也當急難之時雖
有善同門來茲對之長歎而已郭云辭之雖也者言
爲語辭之雖無他義也又孟子故爲政者每人而悅
之日亦不足矣每人猶云人人漢書成許后傳妾伏
自念入椒房以來遺賜外家未嘗踰故事每輒沒上
可覆問也師古云每事皆奏洩于天子乃敢行也愚
案每事猶凡事但云每者省文也又吳志陸抗傳諸

將成欲攻闡抗每不許魏文帝與吳質書每一念至何時可忘此每字猶常也其事非一故云每也魏志夏侯元傳注豐爲中書二歲帝比每獨召與語不知所說比頻也比每猶云常常重言也

殆

詩國風殆及公子同歸毛傳云殆始也孔疏云釋詁云殆始也說者皆以爲生之始然則殆始義同故爲始也愚案殆助辭猶云將也乃也如易繫辭顏氏之子其殆庶幾乎孟子殆於不可殆不可復史記張儀傳蘇秦已而告其人曰張儀天下賢士吾殆弗如

也扁鵲傳乃悉取其禁方書盡與扁鵲忽然不見殆非人也後漢書楊賜傳故春秋兩蛇鬪於南門昭公殆以女敗康王一朝晏起關雎見幾而作諸殆字竝是助辭不爲義也又禮記檀弓不殆於用人乎哉正義云殆近也愚案殆幾也幾有將及之義故云近也魏志王朗傳注登與縣長王雋帥吏兵七十二人直往赴救與賊交戰吏兵散走雋殆見害登手格一賊以全雋命此殆字垂及之辭也又水經注蔡昭冢有石闕闕前有二碑碑字淪碎不可復識辛虎傾低殆

存而已此殆字猶云僅也又荀子強國篇若是則雖
爲之築明堂于塞外而朝諸侯使殆可矣楊注云殆
庶幾也愚案僅將垂庶皆是幾辭展轉相訓其義有
別

迨 爾雅云及也詩國風迨天之未陰雨

乃 古作迺鄭樵云引辭也不絕之義也詩大雅迺召
司空迺召司徒史記主父偃傳以爲諸侯莫足游者
乃西入關見衛將軍乃者繼事之辭猶云爰也又書
仲虺之誥乃葛伯仇餉此乃字猶云乃者如史記歷

書乃者有司言星度之未定也曹相國世家乃者我
使諫君也竝是發語之辭又孟子乃若其情則可以
爲善矣蜀志秦宓傳乃自先漢以來其爵位者或不
如餘州耳至于著作爲世師式不負于餘州耳此乃
字亦是發語辭猶云粵也乃若猶粵若也又書大禹
謨乃聖乃神乃武乃文盤庚具乃貝玉此乃字語助
辭不爲義也禮記雜記祝稱卜葬虞子孫曰哀夫曰
乃鄭注云夫曰乃某卜葬其妻某氏孔疏云乃者言
之助也妻卑故假助句以明夫之尊也又書盤庚萬

民乃不生暨予一人猷同心此乃字亦是語助然與上義別凡非意所及用相違戾則語助云乃也又書盤庚乃祖乃父舊訓乃爲汝案此亦當是語助如後漢書袁紹傳如自乃祖先臣以來世作輔弼任昉爲范尚書讓吏部封侯表乃祖元平道風秀世竝自稱其先祖爲乃祖不訓作汝也又易萃卦初六有孚不終乃亂乃萃此言不終其孚則自亂其所萃上乃字繼事之辭下乃字猶云其也又漢書賈誼傳古之王者太子迺生師古云迺始也又後漢書班固傳伊

考自邃古乃降注云言自遠古以來又周禮小司寇正歲帥其屬而觀刑象令以木鐸曰不用灋者國有常刑令羣士乃宣布于四方憲刑禁乃命其屬入會乃致事疏云謂命已下屬官使人會計文狀來乃致事于王故云乃乃緩辭禮記雜記公視大斂公升商祝鋪席乃斂陳氏集說云乃始鋪席爲斂事愚案此乃字猶云然後亦繼事之辭也文莊子逍遙游而後乃今培風而後乃今將圖南韓非說難大忠無所拂辭悟言無所擊排乃後申其辨知焉此所以親近不

疑漢書敘傳囂問彪曰往者周亾戰國竝爭天下分
裂數世然後乃定吳志張紘傳自古帝王受命之君
雖有皇靈佐于上文德播于下亦賴武功以昭其勳
然而貴于時動乃後爲威耳而後乃然後乃乃後竝
重言也又莊子大宗師孟孫氏特覺人哭亦哭是自
其所以乃且也注云乃如此也愚案自從也言孟孫
以爲人哭而亦哭是從乎世情所不得不然聊且與
之哭也舊讀乃字句絕而以且也屬下句恐非又德
充符子無乃稱此乃字亦合訓如此言無爲如此稱

說也又史記東越傳且秦舉咸陽而棄之何乃越也
何乃猶云何但又公羊春秋宣公八年己丑葬我小
君頃熊雨不克葬庚寅日中而克葬傳云而者何難
也乃者何難也曷爲或言而或言乃乃難乎而也案
乃非難辭以其有然後之義故云難于而也凡事先
已不如此而後始如此者乃云然後故可訓爲難也
又史記大宛傳蓋乃北海云昭明太子文選序蓋乃
事美一時語流千載魏志東夷傳注此蓋乃昔所謂
西戎在于街莫獮道者也蓋乃發語辭也又庾子山

枯樹賦若乃山河阻絕飄零離別若乃更端語也又
後漢書朱穆傳至乃田竇衛霍之游客廉頗翟公之
門賓進由執合退由衰異至乃猶云至于

矧爾雅云況也注云譬況詩大雅矧可射思

忍說文云能也徐氏云能音耐杜子美詩可忍醒時
雨打稀可忍猶俗云爭耐也又杜詩忍使驂驪氣凋
喪此忍字猶云不忍省文也

盡皆也悉也左傳昭公元年周禮盡在魯矣定公八
年虎曰盡客氣也又漢書諸侯王表自雁門以東盡

遼陽爲燕代律歷志詔與丞相御史大將軍右將軍
史各一人雜候上林清臺課諸歷疏密此十一家以
元鳳三年十一月朔旦冬至盡五年十二月各有第
比盡字猶云訖也又廣韻云卽忍切案曲禮虛坐盡
後會坐盡前此盡字當讀如卽忍切今作儘也儘前
儘後者言極至于前極至于後不容餘地今俗云儘
讓是也又增韻云縱令也柳永卜算子詞儘無言誰
會高意周密探春詞儘教寬盡春衫此儘字猶任也
今云任其如何曰儘如何也

準 猶定也劉德仁詩曾緣玉貌君王寵準擬人看似
舊時

允 廣韻云信也愚案信也誠也審也左傳僖公二十
八年軍志曰允當則歸史記司馬相如傳允哉漢德
後漢書文苑傳允所謂遭仁遇神真所宜傳而著之
近 廣韻云幾也愚案將及之辭也後漢書方術傳適
見其鑄此而已近五百歲矣世說主大爲吏部郎嘗
作選草臨當奏主僧彌來聊出示之僧彌得便以己
意改易所選者近半又詩大雅往近王舅南土是保

說文云案古文讀近爲既朱傳云近語辭也愚案朱
說爲長往近王舅猶言汝往哉王舅也又公羊傳撥
亂世反諸正莫近於春秋何休云莫近猶莫過之也
又魏志華佗傳後太祖親理得病篤重使佗專視佗
曰此近難濟悔事攻治可延歲月蜀志宗預傳注臣
松之以爲芝以年啁預是不自顧然預之此荅觸人
所忌載之紀牒近爲煩文晉書謝萬傳王羲之與桓
溫牋曰謝萬才流經通處廊廟參諷議故是後來一
器而今屈其邁往之氣以撫順荒餘近是違才易務

且字辨四
矣此近字猶殆也近得爲幾故亦得爲殆也

反 廣韻云不順也史記封禪書及到三神山反居水

下漢書賈誼傳足反居上又漢書董仲舒傳春秋深

探其本而反自貴者始此反字猶云還也

宛 廣韻云宛然也愚案宛然者如辭也詩國風宛在

水中央言宛然如在也又如國風宛其死矣此宛字

亦是如辭然是假如之義與宛如不同朱傳訓爲坐

見恐非

本 原始之辭也史記齊悼惠王世家灌嬰在滎陽間

魏勃本教齊王反畱侯世家竟不易太子者畱侯本

招此四人之力也

亶 廣韻云信也詩小雅亶其然乎言信然也又通作

但漢書賈誼傳非亶倒縣而已揚雄傳亶費精神于

此

誕 詩大雅誕彌厥月又云誕寘之隘巷朱傳竝云誕

發語辭

但 漢書食貨志民欲祭祀喪紀而無用者錢府以所

入工商之貢但賒之師古云但空也徒也言但賒與

之不取息也淮陽王傳縱不伏誅必蒙遷削貶黜之
罪未有但已者也師古云但徒也愚案但已者言徒
然如此而已不復有所短長也又漢書蕭望之傳後
上召堪更生曰繫獄上大驚曰非但廷尉問邪此但
字猶僅也又魏志鍾會傳但可敕會取艾不足自往
但可猶云只須李太白詩但使主人能醉客不知何
處是他鄉此但字與上義頗相近言只要得主人可
醉客耳又何恤他鄉邪又李陵荅蘇武書但聞悲風
蕭條之聲此但字猶云唯獨也魏志劉廙傳非但君

當知臣臣亦當知君非但猶云非唯非獨又魏志太
祖紀注初不中風但失愛於叔父故見罔目吳質傳
公幹有逸氣但未適耳此但字是轉語猶云第也特
也又王右軍帖但言此心以馳於彼矣此但字猶云
凡也今云但凡如何也

斷 浚辭易繫辭介如石焉甯用終日斷可識矣李義
山詩斷無消息石榴紅

倪 詩大雅倪天之妹毛傳云倪磬也孔疏云磬作是
天之妹又云此倪字韓詩文作磬則倪磬義同也說

具字辨田
文云倪喻也詩云倪天之妹謂之譬喻卽引此詩箋云尊之如天之有女弟與譬喻之言合蓋如今俗語譬喻物云磬作然也愚案倪非譬喻當是宛如之義故以譬喻釋之也倪五兩也又謂之統所以相風者也恐是統宛音近遂以倪作統而以統通宛也

鮮 爾雅云希寡鮮罕也郭注云罕亦希也廣韻云少也論語巧言令色鮮矣仁左傳僖公二十年以欲從人則可以人從欲鮮濟又詩大雅鮮不爲則鮮不少有不也又與眇同魏志明帝紀注夫君有天下而不得萬姓之歡心者眇不危殆

展 廣韻云審也愚案審也信也允也誠也詩國風展我甥兮

審 離騷審吾法夫前修兮王逸云審辭也愚案發語辭也

轉 猶浸也王右軍帖但恐前路轉欲逼目宋書王景文傳吾踰忝轉深足以致謗水經注劉靖碑云詔書以民會轉廣陸費不贍轉得爲浸者言其展轉非向境也

小 少也略也世說上意欲令小加宏潤又云日小欲晚

少 略也漢書賈誼傳此人少壯豈能忘其父哉少壯猶言稍長又云願陛下少畱計言少少畱意也又孟子少則洋洋焉莊子少焉徐無鬼曰嘗語君少則少焉猶云少頃也

了 絕也殊也世說庾子嵩讀莊子開卷一尺許便放去曰了不異人意又歐陽永叔青玉案詞一年春事都來幾早過了三之二過了猶云過卻方言助語也

好 猶善也珍重付屬之辭世說汝若為選官當好料理此人李義山詩好為麻姑到東海勸栽黃竹莫栽桑

可 否之反也中庸天下國家可均也爵祿可辭也白刃可蹈也中庸不可能也又云夫婦之愚可以與知焉夫婦之不肖可以能行焉可即可以以為語助也又大學有國者不可以不慎不可不勉辭也又左傳隱公三年光昭先君之令德可不務乎可不猶云豈可不省文也又廣韻云許可也愚案許可之可有兩

義如孟子事親若曾子者可也此深許之辭論語暮月而已可也此僅可之辭又范曄後漢書自序班氏最有高名既任情無例唯志可推巨博瞻可不及之整理未必愧也又云欲徧作諸志前漢可有者悉令備可不及之猶云當不及之可有猶云當有漢書如禮儀輿服等志皆缺此皆史所宜備故云前漢可有者也蔡邕陳政事七要先帝舊典未嘗有此可皆斷絕以覈真偽魏志鍾會傳但可赦會取艾不足自往邠原傳注軍中士大夫詣原者數百人太祖怪而問

之時荀文若而坐對曰獨可省問邠原巨諸可字皆當辭也當有應合之義亦否之反也又史記高帝紀遇剛武侯奪其軍可四千餘人漢書天文志五殘星其狀類辰去地可六丈此可字約計之辭也又書堯典試可乃已史記作試不可用而已可云不可者省文也如五子之歌雖悔可追言雖悔不可追亦省文也又李義山詩可要昭陵石馬來又云此情可待成追憶又云可在青鸚鵡方雄飛詩棲身可在深此可字何辭也可要猶云何用可在猶云何必又黃機酌

江月詞黃昏可更子規聲碎煙隔賀鑄清平樂詞楚
城滿目春華可堪游子思家此可字猶云那也可得
爲何故亦得爲那也又盧祖臯賀新涼詞可是功名
從來誤可是疑辭也又通作奇詩小雅奇矣富人

果 信也審也史記商本紀是時說爲胥靡築於傅險
見於武丁武丁曰是也得而與之語果聖人漢書趙
后傳宮讀書已曰果也世說有識者果不異人意韓
退之樊宗師墓誌嘗與觀樂曰後當然已而果然又
孟子君是以不果來也趙注云果能也案廣韻云果

定也與此義協凡言與事應曰果既許其來而不來
是不能遽定其來故云不果仍是信審之辭非不能
之謂也又晉語果喪其田注云果猶竟也愚案果是
竟事之辭故得爲竟也

坐

漢書景帝紀它物若買故賤賣故貴皆坐臧爲盜
案漢法入罪曰坐言罪與律應不得移動也賈誼傳
古者大臣有坐不廉而廢者此坐字與上義少別猶
今云緣某事落職也又漢書李陵傳坐預詔之得令
老將生姦詐後漢書光武紀邑曰吾昔以虎牙將軍

圍翟義坐不生得以見責讓漢詩但坐觀羅敷此坐
字猶云因也又蔡邕幽冀刺史久闕疏以陛下威靈
申明禁令在任之人豈不戒懼而當坐設三五自生
留闕邪此坐字猶云定也坐是不動之義故得爲定
也又韋應物詩無將一會易歲月坐推遷坐猶云坐
見可待之辭言歲月推遷將坐而見之也

叵 廣韻云不可也後漢書呂布傳布目備曰大目兒
最叵信叵云不可者語之急兩字連作一聲也又後
漢書隗囂傳帝知其終不爲用叵欲討之班超傳超

欲因此叵平諸國注竝云叵遂也又謝靈運詩懷故
叵新歡此叵字猶云無也因不可之義轉相通借叵
頗 略也少也史記三代世表自殷以前諸侯不可得
而譜周以來乃頗可著叔孫通傳臣願頗采古禮與
秦儀雜就之漢書高帝紀頗取山南太原之地益屬
代師古云少割以益之不盡取也又漢書王莽傳今
阨會已度府帑雖未能充略頗稍給略卽頗也頗卽
稍也此以三字爲重言者也又史記漢興以來諸侯
年表漢獨有三河東郡潁川南陽自江陵以西至蜀

北自雲中至隴西與內史十五郡而公主列侯頗食
邑其中漢書師古注云十五郡中又往往有公主列
侯之邑也愚案公主列侯食邑不盡在十五郡中乃
時有之故云頗也漢書車千秋傳至今餘巫頗脫不
止師古云言往往尙爲蠱也愚案脫或辭頗脫不止
者言時或有爲之者不休止也此二條亦是稍略之
辭而義有不同又史記三代世表孔子因史文次春
秋紀元年正時日月蓋其詳哉至於序尙書則略無
年月或頗有然多闕此與上諸頗字亦相近或頗有

者猶云閒或有之也又漢書陳湯傳騎引卻頗遣吏
士射城門騎步兵此頗字猶云遠也後漢書隗囂班
超傳竝訓叵爲遂叵頗同音則頗亦得爲遂也又漢
書田竇傳於是上使御史簿責嬰所言灌夫頗不讐
劾繫都司空此頗字猶云皆也頗不讐者言嬰爲夫
白冤皆不實也若略不實不應遂囚繫嬰矣如趙充
國傳將軍獨不計虜聞兵頗罷且丁壯相聚攻擾田
者及道上屯兵復殺略人民將何以止之李廣傳李
蔡以丞相坐詔賜冢地陽陵當得二十畝蔡盜取三

頃頗賣得四十餘萬此頗字竝是盡悉之辭頗本訓略而略又有盡悉之義故轉相通也盡悉則是遂事之辭故頗叵又得為遂也又漢書賈誼傳割地定制合齊趙楚各為若干國使悼惠王幽王元王之子孫畢以次各受祖之分地地盡而止及燕梁它國皆然其分地眾而子孫少者建以為國空而置之須其子孫生者舉使君之諸侯之地其削頗入漢者為徙其侯國及封其子孫也所以數償之一寸之地一人之眾天子無所利焉誠以定治而已師古云徙其侯國

列侯國邑在諸侯王封內而犬牙相入者則正其疆界令其隔絕也封其子孫者分諸侯王之國邑各自封其子孫而受封之人若有罪黜其地皆入於漢故云頗也愚案其削頗入漢之頗乃既已之辭不得訓為皆也此緣上文各受祖之分地而言言諸王之地見在而未削入漢者令其子孫分受之其分地眾子孫少者則建而空置之以待更生之子孫受之其業已見削入漢漢又已徙它侯國及封他子孫於其地矣不可奪見在所封者還之乃別以它地如其祖所

封之數而償之此二條者割地定制之大端故云一寸之地一人之眾天子無所利也如師古云乃複舉上文且且有罪黜仍削入之安見寸地一人非所利邪恐不然矣又後漢書五行志引風俗通云龍從兄陽求臘錢龍假取繁數頗厭患之文云丞相邴吉以爲道路死傷既往之事京兆長安職所窮逐而住車問牛喘吐舌者豈輕人而貴畜哉頗念陰陽不和必有所害此頗字猶云甚也

夥 史記注云楚調多爲夥說文云齊調多曰夥愚案

夥驚歎辭也義詳一卷頤字條下

舍 論語君子疾夫舍曰欲之而必爲之辭舍曰猶云

不曰舍是不取之義故可通爲不也又孟子且許子何不爲陶冶舍皆取諸其宮中而用之趙注云舍止也愚案止猶只也舍是止息之義借作止辭也此舍字當讀作去聲

者 說文云別事辭也正字通云凡文有者字所以爲分別隔異也愚案如中庸仁者人也義者宜也是也又增韻云卽物之辭愚案如論語事其大夫之賢者

友其士之仁者是也又論語君曰告夫三子者左傳
隱公五年公將如棠觀魚者此者字語已辭也又唐
人疏狀凡引敕旨訖則以者字足之如韓退之論變
鹽法事宜狀右奉敕將變鹽法事貴精詳宜令臣等
各陳利害可否聞奏者陸宣公收河中後請罷兵狀
昨日欽湊奉宣聖旨示臣馬燧渾瑊等奏平懷光收
河東狀兼令臣商量須作何處置令欽湊奏來者此
者字亦語已之辭當時體例如此也宋人亦多用此
式又公羊傳宣公二年勇士入其大門則無人門焉

者入其閨則無人閨焉者焉者亦語已辭也又論語
安見方六七十如五六十而非邦也者禮記檀弓魯
人有周豐也者也者語已辭又論語孝弟也者此是
語之頓挫與上也者義別又公羊傳桓公二年然則
爲取可以爲其有乎曰否何者若楚王之妻媢無時
焉可也何休云何者將設事類之辭又蜀主王衍醉
妝詞者邊走那邊走者邊猶云此邊也毛晃云凡稱
此箇爲者箇俗多改用這字這乃迎也愚案這音彥
今借作者讀作者去聲韋穀才調集載無名氏詩云

三十六峯猶不見況伊如燕這身材唐人用這字始此

也 廣韻云語助辭之終也愚案詩國風何其處也必有以也此也字在句末辭之終也其後也悔其嘯也歌此也字在句中但爲助句而已又論語回也賜也此語助用之稱謂者也又論語赤之適齊也吾聞之也此也字語之頓挫與語已辭別又孟子我非愛其財而易之以羊也宜乎百姓之謂我愛也我非愛其財句絕而易之以羊也猶云而易之以羊矣言我非

愛財而後以小易大然既已以小易大矣宜乎百姓之謂我愛財也論語其爲仁矣猶云其爲仁也矣得爲也則也亦得爲矣竝辭之頓挫者也又孟子未有仁而遺其親者也未有義而後其君者也語輕但爲也語重則爲者也亦語已辭也又韓非說難所說出於爲名高者也而說之以厚利則見下節而遇卑賤必棄遠矣所說出於厚利者也而說之以名高則見無心而遠事情必不收矣此者也乃辭之頓挫與上者也義別又杜子美詩青袍也自公此也字猶亦也

雅 史記高帝紀雍齒雅不欲屬沛公服虔云雅故也
蘇林云雅素也又漢書燕王劉澤傳今呂氏雅故本
推轂高帝就天下案雅是推原平素之辭故服訓故
也既云雅又云故重言也又世說劉尹先推謝鎮西
謝後雅重劉此雅字猶云極也

假 廣韻云且也借也愚案假是設辭且復譬況故云
且也借也荀子性惡篇假之有弟兄資財而分者水
經注俗說以唐城爲望都城者自北無城以擬之假
復有之途程紆遠山河之狀全乖古證又莊子大宗

師浸假而化予之左臂以爲雞予因以求時夜浸假
而化予之右臂以爲彈予因以求鴉炙浸假而化予
之尻以爲輪以神爲馬予因而乘之豈更駕哉郭象
云浸漸也愚案浸假而化者言假如漸化倒文也此
假字亦是設辭郭云漸者止以訓浸非訓假也今遂
以浸假爲漸者非又莊子德充符奚假魯國邛將引
天下而與從之郭注訓奚假爲何但愚案但第也第
且也假既爲且故亦得爲但也又荀子非十二子篇
假今之世飾邪說文姦言以梟亂天下欺惑愚眾商

宇鬼瑣使天下混然不知是非治亂之所存者有人矣此假字猶云如也若也如若有假設之義故轉相通也又詩周頌假以溢我我其收之朱傳云假何之轉也愚案詩遐假通何遐通故假得轉爲何也

且孟子且以文王之德且以猶云夫以賈誼過秦論且夫天下非小弱也二且字發語辭也又論語且爾言過矣又云且爾與其從辟人之士也豈若從辟世之士哉戰國策宣王曰嗟乎君子焉可侮哉寡人自取病耳及今聞君子之言乃今聞細人之行願請受

爲弟子且顏先生與寡人游會必太牢出必乘車妻
子衣服麗都諸且字是轉語猶云抑也又詩國風且
以喜樂且以永日史記秦本紀臣誠私利祿爵且畱
再用其言得脫一不用及虞君難漢書馮奉世傳丞
相御史兩將軍皆以爲民方收斂時未可多發萬人
屯守之且足後漢書馮魴傳寢等間帝至皆自鬻剔
負鈇鑕將其眾請罪帝且赦之諸且字竝是聊且姑
且之辭又孟子且人惡之又云然且至又云管仲且
猶不可召後漢書孔融傳雖無老成人且有典型諸

且字猶云尙也且猶卽猶尙重言也又史記秦本紀
賓客羣臣有能出奇計強秦者吾且尊官與之分土
項羽本紀范增謂項莊曰若入前爲壽請以劍舞擊
沛公于坐殺之不者若屬皆且爲所虜漢書杜欽傳
欽子及昆弟支屬至二千后者且十人諸且字猶云
將也又戰國策秦伐魏取安邑伐趙取晉陽伐楚取
鄢郢矣覆三國之軍兼二周之地舉韓氏取其地且
天下之半注云且猶幾也愚案猶幾將也又莊子方
且本身而異形方且尊知而大馳陸德明音義云凡

言方且者言方將有所爲也又荀子性惡篇假之有
弟兄資財而分者且順情性好利而欲得若是則兄
弟相拂奪矣且化禮義之文理若是則讓乎國人矣
楊注云且發辭也愚案此二且字亦是將辭乃語之
助不爲義者也語助在句首故楊云發辭也周語叔
父實應且憎以非余一人莊子齊物論夫隨其成心
而師之誰獨且無師乎此二且字語助在句中者亦
將辭也又後漢書文苑傳且公且侯子子孫孫且公
且侯猶云乃公乃侯亦發語辭也又詩周頌匪且有

且匪今斯今振古如茲毛傳云且此也鄭箋云饗燕
祭祀心非云且而有且謂將有嘉慶禎祥先來見也
心非云今而有此今謂嘉慶之事不間而至也言修
德行禮莫不獲報乃古古而如此所由來久非適今
時孔疏云有天下者主于敬待神人接之以禮則人
神慶悅至誠感物祥瑞必臻故知非且有且非今斯
今謂嘉慶禎祥之事非謂其有而已有之以言報應
之疾也且實語助但今謂今時則且亦今時其實是
一作者美其事而丁甯重言之耳又戰國策段干綸
曰臣之求利且不利者非此也注云且猶與也又詩
國風終風且噎此且字猶云又也又漢書郊祀志黃
帝且戰且學仙鼉錯傳險道傾仄且馳且射李陵傳
且戰且引南水經注且田且漕此且字兩務之辭言
方且如此又復如彼也又公羊傳隱公元年且如桓
立則恐諸大夫之不能相幼君也注云且如假設之
辭愚案假得爲且故且亦得爲假也

往 漢書高帝紀見諸將往往耦語往往常也

罔 爾雅云靡罔無也疏云無不有也詩云靡神不舉

書曰罔有攸赦皆是又書大禹謨罔違道以干百姓之譽此罔字禁止之辭猶云無也

儻 疑辭也史記伯夷傳儻所謂天道是邪非邪正義云不敢的言是非故云儻也陳書後主紀夫體國經野長世字岷雖因革儻殊弛張或異至於苟求俊乂爰逮側微用道和羹是隆大廈此儻字猶云或也今云儻或重言也又省作黨漢書董仲舒傳試迹之古返之于天黨可得見乎師古云黨他朗反

黨 荀子天論篇怪星之黨見楊注云黨見頻見也又公羊傳文公十三年往黨衛侯會公于沓至得與晉侯盟反黨鄭伯會公于斐何休云黨所也所猶是齊人語也愚案五百家為黨黨是居處之所故借為語助之所往所反所猶云往時反時時是古通故何云猶是也

枉 徒也空也李義山詩枉緣書札損文鱗

妄 猶云無何無端非意所及故云妄也漢書車千秋傳漢置丞相非用賢也妄一男子上書即得之矣金日磾傳陛下妄得一胡兒即貴重之

併 廣韻云皆也庾子山春賦河陽一縣併是花併是花猶云都是花也又漢書賈誼傳高皇帝與諸公併起師古云併殺雜也愚案併起者一齊俱起故師古云殺雜也

請 以卑承尊有所啟請故云請也論語請問其目又云回雖不敏請事斯語矣

鼎 漢書賈誼傳天子春秋鼎盛應劭云鼎方也賈捐之傳顯鼎貴上信用之如淳云言方且欲貴也又匡衡傳無說詩匡鼎來服虔云鼎猶言當也若言匡且來也應劭云鼎方也張晏云衡少時字鼎長乃易字稚圭世所傳衡與貢禹書上言衡敬報下言匡鼎白知是字也師古云服應二說是

頃 猶云閒也俄頃少閒也史記循吏傳市令告相曰市亂相曰如此幾何頃乎市令曰三月頃幾何頃猶云幾何閒也又漢書楊惲傳頃者足下離舊土臨安定世說自頃世故睽離心事淪蕩此頃字猶云近來也頃不訓近因少頃俄頃之義省而通耳如韓湘詩能開頃刻花竟以頃爲卽辭矣

竝 一作並爾雅云併也廣韻云比也漢書高帝紀諸侯竝起蘇武傳少以父任兄弟竝爲郎竝者同時相比之辭也又後漢書方術傳見者呼之曰薊先生小住竝行應之注云竝猶且也

整 凡數無奇零曰整蜀志諸葛武侯傳亮以建興五年抗表北伐自傾覆至此整二十年

等 廣韻云齊也史記陳涉世家等死曰等死猶云同一死也又廣韻云輩也漢書文帝紀單于無言章尼等非章尼一人故云等以括之又廣韻云類也漢書

趙后傳丞知是何等兒也何等猶俗云那樣又漢書宣許后傳衍曰夫人所言何等不可者何等不可猶云無所不可也又後漢書文苑傳衡更熟視曰死公云等道注云等道猶令言何物語也應璩詩用等稱才學往往見歎譽此等字竝是何辭也又元微之詩總被天公霑雨露等頭成長盡生涯等頭猶云一般又孟東野詩文魄旣飛越宦情惟等閒李義山詩莫訝韓憑爲蛺蝶等閒飛上別枝花皮襲美詩等閒遇事成歌詠次取衝筵隱姓名等閒猶云尋常輕易之

辭也

何爾雅云可也愚案何願辭也心誠願之故爲可也左傳成公四年楚雖大非吾族也其何字我乎漢書高帝紀燕王韓廣亦不何徙遼東又杜子美詩甘從投轄飲何作置書郵何猶云不何省文也

有易繫辭聖人有以見天下之蹟聖人有以見天下之動漢書賈誼傳臣有以知陛下之不能也有者對無之辭確知見其如此故云有以也又論語唐虞之際正義云舜之爲虞猶禹之爲夏外傳稱禹氏曰有

夏則如舜氏曰有虞顓頊已來地爲國號而舜有天下號曰有虞氏愚案此言撫有天下故云有也春秋隱公三年春王二月己巳日有會之亦云有者凡日月合朔日乃會然亦有合朔而不會者有會有不會故云日有會之也又隱公十一年正義云十盈則更始以奇從盈數故云有也愚案以奇從盈數者十是盈數一是奇零之數十有一年猶云十零一年也或云有又也然則十又一年亦是以奇從盈之辭也如論語必有寢衣長一身有半史記孔子世家於是肅

慎貢楛矢石柝長尺有咫諸有字其義竝同又詩國風終風且噎不日有噎朱傳云有又也言不旋日而又噎也儀禮士相見禮主人對曰某子命某見吾子有辱鄭注云有又也疏云鄭轉有爲又者以言某子以命命某往就彼見吾子又自辱來於義爲便故從又不從有也荀子性惡篇以人之性固正理平治邪則有惡用聖王惡用禮義矣哉楊注云有讀爲又又後漢書二王仲長統傳論或推前王之風可行於當年有引菽敝之規宜流於長世此有字猶云或也詳

五卷或字條下又左傳僖公十年不有廢也君何以興僖公二十八年不有居者誰守社稷不有行者誰扞牧圉文公十二年不有君子其能國乎不有猶云若無又僖公二十八年魏犢束胸見使者曰以君之靈不有甯也此不有猶云不敢又論語不有博奕者乎此不有猶云豈無又易繫辭无有遠近幽深遂知來物无有猶云不論又大學未有上好義而下不好義者也孟子然而不王者未之有也未有者洩辭言斷然必無之也又戰國策臣願請藥賜死而恩以相

助字辨別
葬臣王不失臣之罪而無過舉之名王曰有之遂弗
殺而善遇之注云有之蓋然其過舉之言

否 廣韻云不也書堯典岳曰否德忝帝位否德猶云
不德無德也左傳僖公二十三年赴以名則亦書之
不然則否此言不赴以名則不書之也又大學其本
亂而末治者否矣此否字不然之辭也又不然之辭
有二如孟子曰否此汝辭也如漢書成帝紀儒林之
官四海淵原宜皆明於古今温故知新通達國體故
謂之博士否則學者無述焉此否字兩設之辭言不

如此則學者無所傳述也

偶 增韻云適然也後漢書儒林傳詔問昆曰前在河
陵反風滅火後守宏農虎北渡河行何德政而致是
事昆對曰偶然耳太上隱者詩偶來松樹下高枕石
頭眠凡云偶者非常然故得爲適也

後 然後而後乃後竝繼事之辭也又通作后大學物
格而后知至

苟 論語苟志於仁矣無惡也朱注云苟誠也其心誠
在於仁則必無爲惡之事矣又孟子苟得其養無物

不長此苟字辭之未定猶云果也審也又中庸苟無其德不敢作禮樂焉此苟字猶云如也若也又論語苟美矣朱注云苟聊且麤略之意後漢書馬援傳季孟平生自言所以擁兵眾者欲以保全父母之國而完墳墓也又言苟厚士大夫而已此言聊復為士大夫地無他贏望也義與上同又詩國風人之為言苟亦無信舍旃舍旃苟亦無然鄭箋云苟且也愚案此云姑且也又揚子法言非苟知之此言非但知之也苟且也且第也第但也轉相訓

某

儀禮士冠禮字辭曰禮儀既備令月吉日昭告爾

字爰字孔嘉髦士攸宜宜之于假永受保之曰伯某甫疏云伯某甫者若云尼甫嘉甫也但設經不得定言人字故言甫為且字是以禮記諸侯薨復曰臯某甫復鄭云某甫且字以臣不名君且為某之字呼之愚案伯某甫者無所指名之辭凡無所指名及泛言事物與不知姓名皆云某也如儀禮聘禮反命曰以君命聘于某君某君受幣于某宮某君再拜以享某君某君再拜漢書項籍傳某時某喪使公主某事不

能辨成許后傳設妾欲作某屏風張于某所柳子厚
文永有某氏之類是也某甫復者不敢斥君之名也
如尙書惟爾元孫某禮記孝王某之類是也

陡與斗通猝然也張九齡敕日本書丹墀真人廣成
等入朝東歸初出江口雲霧斗暗所向迷方注莘憶
秦娥詞夜來陡覺霜風急

浸浸寢滯浸竝同廣韻云漸也易遯卦彖傳小利貞
浸而長也揚子法言浸以廣大漢書禮樂志質樸曰
消恩受寢薄溝洫志海水溢西南出滯數百里又漢

書劉向傳政由王氏出災異浸甚此浸字猶云彌也益
也廣陵厲王傳滯信女須等師古云滯古浸字漸也
益也

審信也果也黃庭經審能行之可長存史記張巨傳
貫高喜曰吾王審出乎

甚廣韻云劇過也愚案猶極也史記文帝紀今祕祝
之官移過于下以彰吾之不德朕甚不取晏平仲傳
意氣揚揚甚自得也漢書高帝紀欲省賦甚又姜夔
探春慢詞甚日歸來梅花零亂春夜齊天樂詞夜涼

獨自甚情緒此甚字猶何也文周密一枝春詞東風
尚淺甚先有翠嬌紅嫵此甚字猶云如何俗云爲甚
也

恁 方言此也菱夔疏影詞等恁時重覓幽香已入小
窗橫幅又黃機水龍吟詞恨荼蘼吹盡櫻桃過了便
只恁成孤負此恁字猶云如此言便只是如此遂過
卻春也

敢 書湯誓敢昭告於皇皇后帝禮記投壺賓曰敢固
辭主人曰敢固以請儀禮士虞禮敢用絜牲鄭注云
敢冒昧之辭疏云凡言敢者皆是以卑觸尊不自明
之意又書盤庚予敢動用非罰酒誥矧曰其敢崇飲
此敢字猶云豈敢省文也

漸 廣韻云漸次也稍也漢書成帝紀其申敕有司以
漸禁之魏志陳羣傳注太邱長陳寔寔子鴻臚紀紀
子司空羣羣子泰四世於漢魏二朝竝有重名而其
德漸漸小減

奄 詩大雅奄有四方毛傳云奄大也愚案奄有箇蓋
之意故云大也又廣韻云忽也遽也世說注愉始至

鎮而桓元楊佺期舉兵以應王恭乘流奄至

憺 爾雅云曾也郭注云發語辭見詩邢疏云憺猶言曾也會則也皆發語辭郭云見詩者小雅節南山憺莫懲嗟衛風河廣曾不崇朝之類是也愚案此言節南山之憺莫懲嗟猶河廣之曾不崇朝也大雅民勞式遏寇虐憺不畏明雲漢胡甯瘖我以旱憺不知其故毛傳竝云憺曾也憺得爲曾者音相近也

助字辨略卷之三終

海昌曹錦堂杏庭校



70018117

